



Në mbështetje të nenit 5, paragrafi 1, nënparagrafi 1.1, pika 1.1.1, nenit 12 paragrafi 1, nënparagrafi 1.5 dhe nenit 22, paragrafi 3, të Ligjit Nr.08/L-017 për Agjencinë për Parandalimin e Korrupsionit, nenit 21 paragrafi 2 të Ligjit nr. 06/L-011, për Parandalimin e Konfliktit të Interesit në Ushtrimin e Funksionit Publik, neni 11, paragrafi 4, i Rregullores Nr. 03/20023 për Procedurat për Hetimet Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 06.02.2025, nxjerrë këtë:

V E N D I M

- I. Mbyllet rasti APK-DPKI-06-1445/24 për z. Driton Koraqi, anëtar i komisionit për ndarjen e subvencioneve për Rini dhe Sport, OJQ dhe Kulturë të Komunës së Hanit të Elezit, për shkak se nuk ka prova të mjaftueshme që e argumentojnë dyshimin e arsyeshëm për ekzistimin e konfliktit të interesit në ushtrimin e funksionit publik.
- II. Ky vendim është përfundimtar në procedurën administrative dhe i njëjti publikohet në uebfaqen zyrtare të Agjencisë për Parandalimin e Korrupsionit.

A r s y e t i m

I. Rasti i hapur nën dyshimin për konflikt interesi në ushtrimin e funksionit publik për zyrtarin z. Driton Koraqi, është trajtuar sipas procedurës së paraparë me Ligjin Nr. 06/L-011, për Parandalimin e Konfliktit të Interesit në Ushtrimin e Funksionit Publik (në vijim: Ligji për Parandalimin e Konfliktit të Interesit).

Agjencia për Parandalimin e Korrupsionit (në vijim: Agjencia) ka filluar trajtimin e këtij rasti sipas detyrës zyrtare pasi që i njëjti si anëtar i komisionit¹ për ndarjen e subvencioneve për Rini dhe Sport, lidhur me OJQ dhe Kulturë të Komunës së Hanit të Elezit është edhe njëri ndër themeluesit e OJQ "KB Sharri", e cila OJQ është edhe njëra ndër përfitueset e subvencioneve në lëmin e Kulturës dhe Sportit.

Konform dispozitave të Ligjit për Parandalimin e Konfliktit të Interesit, Agjencia përmes shkresës zyrtare (APK-DPKI-1771/24), ka njoftuar z. Driton Koraqi, lidhur me fillimin e procedurës së shqyrtimit të gjendjes së mundshme të konfliktit të interesit në ushtrimin e funksionit publik.

¹ z. Driton Koraqi në rolin e anëtarit të komisionit për ndarjen e subvencioneve për Rini dhe Sport, ka fituar cilësinë e personit zyrtar në kuptim të nenit 3, paragrafi 1, nënparagrafi 1.4 të Ligjit për Parandalimin e Konfliktit të Interesit, i cili definon se: "Person zyrtar - nënkupton çdo person tjetër të zgjedhur ose të emëruar në një organ shtetëror si edhe personat zyrtarë të përcaktuar sipas Kodit Penal të Republikës së Kosovës që ushtrojnë detyra publike dhe që nuk përfshihen në nën-paragrafin 1.3. të këtij neni".

Me qëllim të sqarimit të plotë dhe të gjithanshëm të këtij rasti është organizuar dhe mbajtur një takim me z. Driton Koraqi, në hapësirat e Agjencisë lidhur me këtë rast ku i njëjti ka paraqitur argumentet dhe qëndrimet e tij lidhur me rastin në fjalë, duke theksuar se: *"Përveç pjesëmarrjes në aktin e themelimit të OJQ Sharri, asnjëherë dhe në asnjë rrethanë nuk kam qenë pjesë e çfarëdo organizimi/përfitimi apo çështje tjetër që ka të bëjë me këtë OJQ"*.

Më pas, z. Koraqi ka deponuar edhe dokumentacion në mbështetje të qëndrimeve të tij të shprehura në takim, duke ofruar një njoftim nga KV. Sharri më përmbajtjen vijuese: (citoj):

"Me këtë njoftim ju informojmë se z. Driton Koraqi nuk mban asnjë pozitë udhëheqëse apo rol zyrtar brenda Klubit të Volejbollit "SHARRI". Ai nuk ka qenë trajner apo ndonjë rol tjetër udhëheqës në KV. Sharri që nga themelimi i Klubit të Volejbollit"

Pas konstatimit të gjendjes faktike si më lartë, duke u bazuar në dispozitat e Ligjit për Parandalimin e Konfliktit të Interesit, Agjencia konstatoi se *nuk ka prova të mjaftueshme që e argumentojnë dyshimin e arsyeshëm për ekzistimin e konfliktit të interesit për z. Driton Koraqi, anëtarë i komisionit për ndarjen e subvencioneve për Rini dhe Sport, OJQ dhe Kulturë të Komunës së Hanit të Elezit, vetëm për faktin se është njëri ndër themeluesit e OJQ "Sharri"*.

Kësisoj, me nenin 6 të Ligjit për Parandalimin e Konfliktit të Interesit është përkufizuar nocioni i konfliktit të interesit, ashtu që: *"Konflikti i interesit lind nga një rrethanë në të cilën zyrtari ka interes privat, që ndikon, mund të ndikojë ose duket se ndikon në kryerjen me paanshmëri dhe objektivitet të detyrës së tij zyrtare"*.

Lidhur me nenin 3, paragrafi 1, nën-paragrafi 1.2 të Ligjit për Parandalimin e Konfliktit të Interesit, me të cilin është përkufizuar se: *"Interesi privat i personit zyrtar - nënkupton çfarëdo përparësie për personin zyrtar, familjen e tij, të afërmit, miqtë dhe personat apo organizatat me të cilat ai ka pasur apo ka marrëdhënie afariste"*, si dhe me nën-paragrafin 1.6 të këtij nenin me të cilin është përkufizuar se: *"person i afërm me zyrtarin është bashkëshorti ose personi që bashkëjeton, të afërmit në vijë të drejtë të gjakut pa kufizime, të afërmit në vijë të tërthortë deri në shkallën e katërt, adoptuesi, i adoptuari, i afërmi në gjini të krushqisë deri në shkallën e dytë si dhe çdo person fizik apo juridik i cili ka pasur ose ka një lidhje të përbashkët interesi privat pasuror ose jopasuror me zyrtarin. Për qëllime të këtij ligji, personi juridik konsiderohet si person i afërm, sipas dispozitave të Kodit Penal të Republikës së Kosovës."*

Ndërsa, dispozita e nenit 3, paragrafi 1, nën-paragrafi 1.12 të Ligjit për Parandalimin e Konfliktit të Interesit, e definojnë nocionin vendimmarrje si: *"çasti i fundit i procesit vendimmarrës gjatë të cilit vendoset përmbajtja përfundimtare e aktit apo kontratës si dhe ato çaste paraprake të vendimmarrjes të cilat janë thelbësore dhe përcaktuese në të cilat pjesëmarrja, ndikimi dhe qëndrimi i zyrtarit përcaktojnë përmbajtjen përfundimtare të aktit apo kontratës si dhe çdo veprim i zyrtarit në ushtrimin e funksionit publik."*

Pra, në kuptim të dispozitave të sipërcituara, konflikti i interesit është i lidhur ngushtë me procesin e vendimmarrjes apo çasteve paraprake të vendimmarrjes, nën kushtet e ekzistencës së interesit privat të zyrtarit apo të personave të afërm me të, në një çështje të caktuar. Për tu konstatuar konflikti i interesit në një çështje të caktuar, duhet të plotësohen kushtet thelbësore (kumulative) të tij, siç është vendimmarrja apo çastet paraprake të vendimmarrjes si dhe interesi privat i zyrtarit ose i personave të afërm me zyrtarin.

Në rastin konkret, është fakt se ekziston roli vendimmarrës i z. Driton Koraqi në cilësinë e anëtarit të komisionit për ndarjen e subvencioneve për Rini dhe Sport, OJQ dhe Kulturë të Komunës së Hanit të Elezit, por nuk është gjetur se zyrtari në fjalë të ketë (pasur) *interes privat për vete apo personat e afërm me të* në çështjen në fjalë, pasi që i njëjti, përpos pjesëmarrjes në aktin e themelimit, nuk ka (pasur) asnjë funksion në Klubin e Volejbollit “Sharri”.

Prandaj, edhe përkundër rolit vendimmarrës të z. Driton Koraqi në cilësinë e anëtarit të komisionit për ndarjen e subvencioneve për Rini, Sport dhe Kulturë të Komunës së Hanit të Elezit, në mungesë të plotësimit të kushtit tjetër kumulativ (*interesit privat të zyrtarit apo të personave të afërm me të*), në rastin konkret përjashtohet konflikti i interesit sipas dispozitave të Ligjit për Parandalimin e Konfliktit të Interesit.

II. Agjencia vendosi si në pikën II. të dispozitivit të këtij vendimi, duke u bazuar në nenin 22 [*Procedura administrative e Agjencisë për rastet e konfliktit të interesit*], paragrafi 12 të Ligjit për Parandalimin e Konfliktit të Interesit, me të cilin është përcaktuar se: “*Të gjitha vendimet që i nxjerr Agjencia lidhur me konfliktin e interesit në ushtrimin e funksionit publik dhe shkeljen e dispozitave të këtij ligji, përfshirë veprimet e ndaluara ose të kufizuara në ushtrimin e funksionit publik, ushtrimin e veprimtarive të tjera, papajtueshmëritë në ushtrimin e funksionit publik, duhet të respektohen nga zyrtarët dhe institucionet përgjegjëse. Ato bëhen publike në faqen zyrtare të internetit të Agjencisë.*”, si dhe paragrafin 15 të këtij neni, me të cilin është përcaktuar se: “*Vendimet e Agjencisë në lidhje me konfliktin e interesit janë përfundimtare në procedurë administrative.*”

Nga sa u tha më lartë, duke u mbështetur në dispozitat e Ligjit për Parandalimin e Konfliktit të Interesit, u vendos si në dispozitiv të këtij vendimi.

Vendimi iu dërgohet:


YLLI BULESHKAJ
Drejtore i Agjencisë për
Parandalimin e Korrupsionit

- Zyrtarit të lartë publik
- Drejtorit të DPKI-së
- Z./znj. (zyrtari përgjegjës)